

陰

陽

判

上

資



陰陽判

古本戲曲叢刊五集

據上海圖書館藏
清初刊本景印原
書版匡高一八一
毫米寬一三〇毫
米

陰陽判傳奇序

千鍾綠蟻難澆扼塞之腸一曲紅牙漫寫
英雄之恨江上之悲風夜起怨入宮商匣
中之秋水時鳴怒衝冠髮君前淚落怕聞
河滿之詞燭下眉低愁唱鷓鴣之什況乎
義關毛裏一腔之熱血橫流事極冤誣五
夜之文犀莫照苟不乞靈於優孟肖彼衣

冠誰爲借筆于史狐傳之簡冊嗚呼此傳
奇之所由作也夫乾坤浩浩鴟鴞偕鸞鳳
齊生今古悠悠孝子與忠臣並錄夢東門
之草兒女子亦解除兇懸枯塚之頭大丈
夫真能報父然而世無秦鏡妖魅宵行吏
有羅鉗陽烏晝晦銅山金穴總爲鬻獄之
資封豕長蛇不改鬻人之智縱使洞曾碎

首尚有餘辜堪嗟嘗膽臥薪終難共戴不
嫌饒舌爲語知音朱公以磊落之才半生
任俠厖獍以豺狼之性一市稱雄苗莠分
畦薰蕕異氣顧以設糜待餓名歸長者之
門因而折簡邀賓釁啟酒人之坐雖閨中
強諫婦並王章而醉後疎狂途窮阮籍羣
兕螳聚爭揮都尉之拳醜類蜂屯竟摺應

侯之脅斯時也奄奄命盡陳元龍之豪氣
未除渺渺魂歸蔣子文之英靈不泯於是
孝子拊膺慈孫動魄呼天有血哀號長吏
之庭搶地如崩隱破讎人之膽却千金於
宅相西州賴有羊曇堅一諾於宗盟南國
重逢季布詎料陶朱之子已囑莊生還將
孤白之裘私投鄭袖面塗粉墨靡師楊震

之清座繞雷霆不顧阿香之怒遂使沉冤
盆覆難將成案山移時則痛絕子心哭殘
親骨銜哀涉險僵仆黃河遮道陳詞飽經
白槌淒風苦雨行人憐范叔之寒九食三
旬曠野乏王孫之飯縱喜驄留桓典其如
幕有郅生叩鑾輿而咫尺難通情同萬里
磨霜刃而十年未試憾切終天冀一當而

不能將萬死其奚贖然而人間碧血到底
消沉天上青蓮終成幻化談空揮塵袈裟
清百劫之塵負土成墳毛髮殉九原之魄
矢精誠乎白日瀚海生塵格幽意於蒼旻
炎天飛雪冥漠之報施不爽如來之證果
非虛當年獄底殘魂旣淪胥於苦海今日
市中虢虎都滅跡於閻浮薛家之三鳳方

新鄧氏之一簪何在禪心徹處打開人鬼
關頭慧眼看時照破陰陽境界試向笙歌
隊裏坐山僧一箇蒲團好從遊戲場中聽
子弟數聲檀板

海上弘軒主人題

陰陽判傳奇序

天地間多缺陷事天地不能自補而
俟人補之人何以補之補之以事補
之以心事則華袞斧鉞其權伸其事
快心則呼天搶地其勢屈其心痛夫
至天下後世痛其心而事已無補天

地亦何貴是人之補之然使仳仳睨
睨路人君父則不獨缺陷在事且缺
陷在心天地但能以人心補事又將
用何物補心是故天地之寶心爲貴
心貴故心不易泯卽當局者自甘泯
泯而公道在人必從而長言之嗟歎

之流連而歌咏之甚之感時憤世者
撫其事蹟譜以宮商直欲以野董狐
代鬼咎繇王章陰律手爲平反由是
枉者伸覆者發潛德闡姦諛誅向之
大痛於心者究竟大快於事而天地
一缺陷於是乎坦坦平平此陰陽判

傳奇所以不得不作也余諦觀朱孝
子矢志報讎旣不能駢戮讎黨復不
能剗刃讎腹則是父讎終未報也獨
其枕戈待旦須臾不忘雖海有時枯
石有時泐而此志耿耿不磨歷二十
五年讎黨盡伏冥誅卒以戴天爲恨

一慟而絕他山老人豈誠快其事乎
夫亦痛其心焉耳痛其心而按紅豆
付梨園吾知觀劇者見其讎之狠毒
也將羣然而怒是卽孝子之拊膺飲
血而怒之者也見其讎之狡脫也將
羣然而罵是卽孝子之決眚衝髮而

罵之者也見其讎之燔於冥誅入於
異類也終且羣然而樂是卽孝子之
食肉寢皮破涕爲笑而樂之者也是
編一日不磨則是事一日不朽合天
下後世百千萬人之公怒公罵公樂
以報孝子欲報之冤而孝子之心畢

矣而孝子之事畢矣陰陽判如之何
可以不作且夫天下顛撲不破者理
焉已耳陽判不公而至決之以陰判
孰不以爲誕妄無憑然而苞苴難用
於夜臺請託不行於雷部積惡餘殃
到頭結案斷斷如此奈何不認作照